

四庫全書

集部

欽定四庫全書

鄮溪集卷九

宋 鄭獬 撰

詔

賜觀文殿學士刑部尚書知亳州歐陽修乞致仕不允詔

勅歐陽修省所上表并劄子乞致仕事具悉古之七十而還君事不得謝則賜之几杖卿儒學之師歷事三朝近辭國政之繁聊從便藩之樂乃復需奏願歸乎田廬

夫老而引年掛車故里茲雖恬退之高致而卿顏髮猶壯未及傳家遽以印綬來上無乃太早計乎年雖至也朕猶且賜之几杖以為士大夫表儀況其未至乎所乞宜不允

賜觀文殿學士刑部尚書知亳州歐陽修乞致仕不允詔

勅歐陽修省所上劄子奏乞致仕事具悉卿文章之老陪議廟堂竭誠奉國以熙大任引紱便藩已非所處掛

車故里豈得遽歸刻章疊至深避謗誣苟行已之不愆
奚浮言之可恤至於衰疾早徵艱於莅事則勉圖醫藥
神明自還閉閣高卧猶足以成治也所乞宜不允

賜守司徒兼侍中韓琦辭免恩命不允詔

勅韓琦省所上表辭免加功臣食邑事具悉三歲而郊
躬見上帝及其竣事大均慶澤自丞弼而下至於庀事
之臣咸有以蒙被茲皇祖之成訓朕何敢有失焉卿秉
鈞舊老勅勲三朝聊擁帥節偃息故鄉是宜稽叅茂制

錫之以優數所以表神釐之貺而增藩輔之榮在德為稱又奚煩乎固辭所辭宜不允

賜樞密院使守司空檢校太師兼侍中文彥博

辭免恩命不允詔

勅彥博省所劄子奏辭免恩命事具悉爵賞非朕之有維天下之賢者處之將符相印上公之袞與實相副豈曰侈哉則朕付卿以右樞之柄而加賜以大司空醕庸茂德非爵賞之私也朕方咨爾元老共圖太平公其亟

起就位拜之勿辭所乞宜不允

賜新除守尚書左僕射觀文殿大學士判河陽
富弼不允詔

勅富弼省所上劄子奏蒙恩授臣尚書左僕射觀文殿
大學士依舊判河陽非便郡養疾之所敢當也即望授
臣右僕射事具悉卿以疾辭將相之印易以文昌左揆
還守盟津比德課功不為幸位制爵以賢安用辭為卿
國之老成白首一節左攝大均之柄右秉洪樞之軸仁

祖英宗嘗動容而尊禮之施及冲人庸何不式宜體朕懷往其祇踐所乞宜不允

賜新除守司空兼侍中富弼辭免恩命不允詔
勅富弼省所劄子辭免恩命事具悉朕惟列聖之遺業
以次相授乃屬於眇末邈如登天豈不難哉故思夫老
謀碩德之臣同心協力乃能勝克卿才完器周國之舊
老登翼兩朝功名爛著嬰以末疾遂去近藩神明相之
所履復寧在朕虛懷尤所欽待廟堂魁柄首以付卿天

下顯顯實望復起而乃徇曲士之節為辭謝之高懇惻累牘畏避過甚朕之用卿蓋為天下宜體朕意亟受印綬眷眷之懷豈能殫極所乞宜不允

賜戶部尚書參知政事張方平乞免起復不允
詔

勅方平省所上表乞免起復恩命事具悉朕方履天下之籍疇咨大臣以共天職以卿雋茂老德久鬱而未奮斷自朕志擢佐鼎軸將觀夫深謀秘議倏然起廟堂而

澤四海未及踰月而遽罹艱棘釋位而去已畢哭踊之期宜從墨縗還從舊府深謀祕議遂卒其功烈此朕所以拱袂以俟卿之來耳所乞宜不允

賜醴泉觀使定國軍節度使李端愿乞致仕不允詔

勅端愿省所劄子具悲卿出於貴胄以忠義自奮丹心炳炳時見於嘉論乃緣屬疾欲上齋鉞而去夫愷悌君子神明之所相顧茲微疹安能遂困爾耶勉近醫藥行

復大庭之朝掛車歸第無煩累辭也所乞宜不允

賜邊將乞朝覲不允詔

省表具悉爾以純忠大節為朕虎臣金鉞繡旗建車而出控扼乎夷塞蒐兵牧馬斥堠嚴謹氊裘引弓之俗服鳴鏑而引去可謂國之長城善守而屈人者也而丹誠款款結戀紫闥屢馳奏牘願覲彤庭此誠忠臣在外乃心乎王室而朕亦欲識卿以慰傾想之懷然而漢關之北畛域相接霜高弓勁胡馬肥健方藉賢守以捍侵軼

豈宜釋藩垣之重寄而述職乎闕下哉三年奉計顧亦不遠合符擁節及瓜而歸則朕當歌出車之詩以勞爾之旋也今茲勤請難徇來章所乞宜不允

賜宣徽南院使判延州郭遼乞京西一郡不允

詔

勅郭遼省所劄子奏乞京西一郡事具悉西羌旅拒為日滋久今雖馳使款塞來賓狼子難馴豈能終保朕方遘東才傑俾鎮邊衝畜馬蒐兵月防侵軼故輟卿於右

樞付卿以齋鉞獨當方面庶無顧憂何為遽上封函懇
求便郡引保身之深戒陳責帥之大經專徇嫌疑將圖
引避非所以體本朝注意之誠慕良將忘家之義毋煩
過計疊有露章已勅有司勿令通奏勉旃從事以副朕
懷所乞宜不允

賜宰臣曾公亮乞免退不允詔

勅公亮省所劄予以雨雪愆亢乞從黜免事具悉維我
烈祖以至仁營天下之化卿實佐其成維我文考以至

明應天下之變卿實輔其行以先聖人之盛德猶需卿以濟況予眇末初履政機若涉交岐罔知攸適而卿乃欲因災引咎上印綬而去夫亢沴踰時皆蒙其害此上帝之警予耳奚煩輔臣累牘而請避書雖千百上朕亦不聽也所乞宜不允

賜樞密副使諫議大夫邵亢乞出不允詔

勅邵亢省所上表乞出事具悉漢宣帝嘗以博士諫議大夫補郡蕭望之以為憂末而忘本非成康致太平之

意卿純忠厚淑疊疊而不倦先皇帝擇以遺予乘時撫翼遂叅樞府方茲肇祀四海蒙福且將都俞賡歌共濟乎太平之務遽自抑損請麾藩國夫以博士諫大夫猶為不可又況予之大臣乎所乞宜不允

賜觀文殿學士知徐州趙槩乞致仕不允詔

勅趙槩省所奏上表乞致仕事具悉露章屢上辭意懇惻眷言耆德之舊實為朝廷之望豈無安車駟馬蓋惜老成之去耳夫彭城近藩土風甚美惠愛在民獄訟自

息固足以順神冲漠抗志逍遙何必掛冠林下追東洛
角巾之遊然後為得哉所乞宜不允

賜觀文殿學士吏部尚書知徐州趙槩乞致仕
不允詔

勅趙槩省所上表乞致仕事具悉卿股肱舊德陪論宰
庭懇言請藩遂莫近服朕眷猶惜其去況欲引年祈謝
君事賢哉大夫雖可嘉尚國之元老豈宜告歸副此虛
懷勉綏吉履所乞宜不允

賜新除吏部尚書充觀文殿學士知徐州趙槩
辭免恩命不允詔

勅趙槩省所劄子只乞守本官知徐州事具悉古之卿
大夫出封必加一等所以進有德褒有功也卿將明肅
父久參槐鼎之論引年佩符獨無錫命以寵吾藩垣之老
哉茲非私恩是亦古之顯德褒功之數耳所乞宜不允
勅

南郊御札勅

朕蒙先帝之烈履四海之尊恭循列聖大孝之醇躬服三年
通喪之義出則素冠禪衣以御事入則苴杖衰麻以宅憂雖
祥祭之已除追仙遊而增慕洪惟禋祀實在諒陰深懷情禮
之異殊博采古今而叅議近臣合奏大典可稽在昔執文考
之憂雖居廬而終制維是饗天神之貴將越紼而講儀於
晉則踰年而命郊在漢則即位而見廟既葬可以加冠卒哭
於是大烝况茲章聖之時亦講園丘之制顧惟眇德敢越
舊聞至於羽衛之繁文金石之雅奏自朕躬之所奉俾有司

之絕儀務在協中以叅往制故茲札示想宜知悉

賜右諫議大夫知瀛州李肅之獎諭勅書

勅肅之省所奏勒瀛州分析到地震倒塌城壁樓櫓十月二十日終已修了當事具悉坤德不寧朔陸連震顧河間之莫壤控北漠以開藩城堞蕩搖樓櫓摧仆隳金湯之重險失屏翰之巨防卿懇力經營疚心夙夜大庀工徒之衆亟興板築之勞役不踰時事無愆素復據三關之與載完百雉之雄丕勅肇成露章薦至惟忠勤之

可尚在鑒寐以無忘特遣史華往申言諭茗腴靈劑兼示寵頒

賜御侍夫人魏氏以下勅書

勅御侍夫人魏氏以下祇奉園寢夙夜良勤日月驟馳已踰禪祭宜承詔使還歸禁庭今差司簿武氏賁勅書往彼到日並可發來赴京

賜御侍夫人以下守陵回京沿路茶藥并撫問勅書

勅御侍夫人魏氏以下陵寢衣冠爾惟嚴事甫除素韞
被詔言還冒履修途諒多勞勩乃增懷念特示寵頒今
差使臣泐路各賜臘面茶三斤縛子茶三斤藥物一銀
合合重二十兩至可領也並傳宣撫問

賜入內副都知石全育等守陵回泐路茶藥並
撫問勅書

勅石全育國陵之奉霜露再葦夙駕言歸跋履方永特
馳使指寵錫惟優仍示撫存體予嘉矚

賜淮南王三軍將吏僧道百姓等勅書

勅淮南王三軍將吏僧道百姓等朕以韓琦秉均元宰
定策老臣上相印以懇辭即將壇而往拜載瞻督撫南
據靈淮維我新恩蓋爾舊治有勞定國方均逸以便藩
遺愛在民想驩闕於成命今特授韓琦守司徒檢校太
師兼侍中行揚州大都督府長史淮南節度揚州管內
觀察處置營田等使判相州軍州事同羣牧使兼管內
觀農使加食邑一千戶食實封四百戶仍改賜推誠保

德業仁守正協恭贊治亮節翊戴功臣散官勲封如故
故茲示諭想宜知悉冬寒將士等各得平安好叅佐官
吏僧道耆壽百姓等並存問之

賜劍南西川三軍將吏僧道百姓等勅書

勅劍南西川三軍將吏僧道百姓等朕以文彥博器包
文武位冠機衡方履祚於元符宜褒功於哲輔睠維井
絡舊擁魚符遺風未衰故老猶在想聞嘉命益沸驩聲
今特授文彥博守司空依前檢校太師兼侍中充樞密

使兼羣牧制置使行成都尹充劍南西川節度使管內
觀察處置橋道等使加食邑一千戶食實封四百戶功
臣散官勲封如故

賜五臺山十寺僧正順綰已下勅書

勅順綰等省所進同天節功德疏到闕事具悉靈峰特秀
寶刹對開繡西竺之祕言獻南山之善祝再惟忠款良用
歎嘉今賜順綰等紫僧衣一對絹二十疋故茲示諭想宜
知悉

賜西南蕃龍異閣等勅書

勅龍異閣等省所附進馬一疋朱砂八兩事具悉汝奠
居絕徼久服外藩瞻北闕以馳風旅大庭而來享載嘉
勤蓋宜有賚頒今回賜汝江中錦旋欄衫一領八兩渾
鍍銀腰帶一條衣著二十疋至可領也故茲示諭想宜
知悉

賜梓州路轉運使趙誠獎諭勅書

勅趙誠省所奏誠去一路冗占兵士及立到定額事具

悉朕比申飭監司考覈兵籍或奉私而妄占俾責實以
罷歸仍立嚴科庶懲末弊卿宣風左蜀勵節東朝首奉
詔音具為條奏悉按列城之數並除羨卒之餘創以定
規減於舊貫眷言忠藎深切嘆嘉仍示頒恩用褒成效
仍賜汝銀五十兩絹五十疋已劄與梓州支賜訖奏故
茲獎諭想宜知悉

批答

賜宰臣曾公亮乞免罷第二表不允批答

省表具知成湯之禱旱則曰政不節與使民疾與何以
不雨之至斯極也周宣王之憂旱則曰耗斂下土寧丁
我躬謂天下之被害不若身當之也是二君者曷嘗移
咎於下哉固不聞伊尹有去位之辭仲山甫有免官之
議蓋遇天地之災變而策罷宰相者此衰漢之制非盛
德之舉庸何取焉君其勉修政績以導和氣則嘉澤之
應斯亦拱而俟之矣所乞宜不允

賜文武百寮曾公亮已下乞皇帝御正殿復常

膳不允批答

省表具知朕圖治不明上累三光之變乃以正月朔日王者統事之初蒙氣湛掩蝕于太陽考諸古義為咎莫大焉故朕虛虎門之朝徹牢鼎之膳思有以恐懼修省少謝上天之譴告而二三輔臣暨百辟庶尹亦宜協心相勵以輔不逮至於面天庭之正宁享四食之燕羞爾言雖忠顧豈朕之欲聞耶所請宜不允

第二表不允批答

省表具知鮑司隸有言正月之朔小民猶恐敗毀物器
況日虧乎蓋皇極之不建則日月側匿其甚則交蝕乃
復譴見於三朝之會上帝聰明鑒觀甚邇灾祥之見如
虛谷之傳響豈不懼哉是以引避戶牖之坐損去秩膳
側躬省咎庶期消伏詩不云乎畏天之怒不敢戲豫朕
畏天者也則雖虛大昕之朝徹燕食之羞又奚為過哉
所請宜不允

賜宰臣曾公亮已下賀壽星出見批答

省表具知春仲氣分珠躔效祉出乎丁位潤澤而明太
史發占以符萬壽卿等股肱一德共代天工觀此騰文
志在歸美俾存信牒傳之無窮載閱需章良增嘉愧所
賀知仍依奏宣付史館

賜樞密使文彥博等賀壽星出見批答

省表具知維彼見象天極之南參驗靈編實資壽歷星
官動色來告休符卿等登翊萬樞協成元化形於中悃
慶牘繼來頌歎嘉祥俾書史氏循讀於再深愧乃懷所

賀知

賜禮部尚書叅知政事趙槩乞致仕第一表不

允批答

省表具知卿以懿文擢鼎科淳德佐槐府順承帝載得
坤厚安正之吉顧朕不明方倚卿以天下事馴致美化
直趨乎太平之域乃引古義欲藏其車蓋而去茲豈朕
之望卿耶勉爾謨明以經王室無以耄耄而自嫌之所
乞宜不允

賜趙槃乞致仕第二表不允批答

省表具知七十而還君事蓋有不得謝者焉以卿之耆明秉哲叅論乎廟堂以維持乎巍巍之業者乃必欲抗其高躅而去耶雖將自佚乎紱冕之外其如士大夫之議朕何所乞宜不允

賜文武百寮富弼以下上尊號第一表不允批答

省表具知古之帝王未有美號嘗以火食教民者則曰

燧人氏取犧牲以為庖厨者則曰庖犧氏始耕以粒食者則曰神農氏至於有熊氏高辛氏高陽氏則皆以所興之地名之唐堯虞舜大禹雖都帝王之位而天下直斥之而已又何嘗取尊美之稱以冠其上哉孔子曰若聖與仁則吾豈敢以孔子而不敢當仁聖之目而公卿百執事乃猥以奉元憲道文武仁孝之號而加於予予何德以堪之夫皇者君也大也帝者配德于天地者也合是二義而兼有之蓋已嘗缺然自愧況又欲加隆於

此者乎其亟罷議毋以虛名浼予也所請宜不允

第三表不允批答

省表具知奉元所以體天憲道所以稽古文以起制度
武以消奸軌仁者澤含四海而不殊孝者光大祖宗之
業而日新今天之方艱變怪屢出謂之奉元可乎聰明
未屬動而繆戾謂之憲道可乎禮樂衰缺而不完則文
之所致者陋夷狄桀慢而屢警則武之所制者狹生靈
憔悴而祖宗之業不加焉則仁孝之實將安所施號者

功之表也其功茂者其號美惟予之所施如此尚何敢冒乎功茂之稱哉雖欲強之天下其將謂予何所請宜不允

第五表不允批答

省表具知灾異之未息政治之未明黎元之未乂此朕嗛嗛而不遑公卿庶人藩衛之臣蠻夷老耄乃日伏大庭厥角仰顙章五上而不止必欲致朕以徽稱羣言之迫安能固拒夫有其實有其名君子享之名浮而實不

充君子以為恥惟爾二三股肱洎內外列辟同心協德
共濟大治人事緝於下則天道叶於上朝廷修飭則諸
道順軌元元之衆咸得蒙福俾予襲其名而安其實豈
不休哉所請宜不允

賜文武百寮請皇帝聽樂第一表不允批答

省表具知昔者子夏既除予之琴撫之而不成聲曰先
王制禮不敢過也子張既除予之琴撫之而成聲曰先
王制禮不敢不及也然則二子者均於得禮而子夏有

哀心焉故孔子謂孟獻子加於人一等是子夏之未忘
哀不猶愈於子張乎朕之宅憂三年甫畢餘日永念聖
考之愛雖終天而猶存豈可朝釋纖縞暮奏金石巨創
未夷已臨燕衎是誠何心哉必欲行禮則孟獻子設而
不樂朕將有取焉所請宜不允

第二表不允批答

省表具知昔堯之崩而舜思之坐則見堯於牆食則見
堯於羹蓋未之忘也禮曰父沒而不能讀父之書手澤

存焉耳朕之失先帝三年周旋于其居則先帝之宮闕在焉于其出則先帝之都邑在焉左右視聽之間皆先帝之舊也累累焉繭繭焉何嘗不悽愴以驚懷徘徊而攬涕而四時忽焉不知縞素之已終哀痛未盡思慕未衰而遽欲撞萬石之鐘列九成之奏以娛心悅耳為樂乎茲朕之所不忍也重煩羣公之言深用愧腴所請宜不允

第三表不允斷來章批答

省表具知王之執憂不以貳事而宗室之諸老暨于勝衣而朝者咸以書聞覬王之還職以董正屬籍正有以表儀而仰法焉則奚獨予一人強欲奪王之哀乎且踐膺茂冊以慰兄弟渠渠之意所辭宜不允仍斷來章

賜新除叅知政事唐介辭免恩命不允斷來章

批答

省表具知古之君子願乎仕者非謂紱冕之足以美乎服輿馬之足以侈乎御也蓋欲行其志焉耳朕選卿于

衆以叅論國政質之羣言而皆合斷之朕心而不疑乃命以位疇能間之是亦欲行卿之志耳胡為冲執拜言而請辭茲豈明朕之意而務行古君子之願哉所辭宜不允仍斷來章

賜叅知政事趙抃唐介辭免恩命不允斷來章
批答

省表具知朕之齋明祇栗大亨帝于圜丘維是二三股肱之老相成熙事天人歆德休光下集而錫予之福如

阜如陵茲豈朕之專饗哉是亦二三股肱之老有以共之也為俎之惠猶貴乎及下若是者尚何辭焉

賜皇伯集慶軍節度使檢校尚書左僕射宗諤辭免恩命第一表不允批答

省表具知朕覽縉紳之議越紼而郊亦既右饗錫之神策嘉與伯父叔父均釐於下此上帝列祖之賜朕承而恭授之又曷足以抗辭哉所辭宜不允

賜皇弟岐王顥辭免恩命第一表不允批答

省表具知朕升禋合祭謁款天神推其福貺被之四極
垂紳在次罔不均休而況予之介弟爵為真王朝踐之
獻實陪祀事宜錫恩章以答雖肅尚何謙畏抗言弗處
往即欽拜庸體朕之至意所辭宜不允

賜曹侑辭免恩命第一表不允批答

省表具知朕遵列祖之遺業三歲而郊需其天澤繇廟
廷而薄四海而予之元舅出陪清蹕入上嚴奏宜有嘉
命以均神貺發於朕志孚告在廟渙乎如汗其不可及

已雖欲行意詎得從乎所辭宜不允

賜宗諤辭免恩命第二表不允斷來章批答

省表具知祭之有澤者為政之術也下而甲吏守門之賤猶且及之況夫雖肅藩戚之臣委綏結綬祇事以助祭者耶故茲孚命所以均神明之貺曷為累言而懇避詩不云乎烈文辟公錫之祉福爾亟受之無辭所辭宜不允仍斷來章

賜岐王顥第二表不允斷來章批答

省表具知古之大祭歸朕膳于兄弟之國所以示親親之意而同神靈之祚朕既薦璧嘉壇上帝錫之純嘏豈敢專饗宜與兄弟共有之乃欲懇避而為辭爵之高是非古之為祭而厚骨肉之義也所辭宜不允仍斷來章賜曹侑第二表不允斷來章批答

省表具知朕以眇躬獲薦忝稷報功於上帝而侑以烈祖天人顧饗福祿來介故嘉與士大夫共拜神靈之賜則褒章顯號積重而均及者非有私元舅也其為朕倡

率士大夫往即拜之所辭宜不允仍斷來章

賜叅知政事趙槩乞致仕不允斷來章批答

省表具知古之尚齒七十者君問則席所以尊者哲而風孝悌卿以寬懿敦實之姿佐金鼎以調元氣其齒則老矣其神明之外發者豈有衰哉朕初履祚方且布席以咨國政需大化之隆洽然後議其去顧不美歟所乞宜不允仍斷來章

賜宗樸辭恩命第二表不允斷來章批答

省表具知朕之初蒞祚豐恩不浹涵蒙乎萬物而獨伯父有所不及茲豈篤親興仁之義哉袞衣金鉞登拜已晚乃復引章雖三揖而未進往宜欽踐以祇奉先王之祀所辭宜不允仍斷來章

賜樞密使文彥博辭免恩命不允斷來章批答省表具知懋官懋賞古今之通誼卿以純忠首國共濟於艱虞之辰定策禁中義貫乎金石大業一定若泰山之四維是用進拜上公以稱厥德奚為自疑露章引避

昔舜命皋夔一辭而止卿乃五辭矣亦可以已乎所辭
宜不允仍斷來章

賜新除檢校尚書左僕射同中書門下平章事
彰德軍節度使宗櫟第一表辭免恩命不允批

答

省表具知封植戚藩以強王室此古治世之成法伯父
天屬之尊恂恂謹禮樂善而不厭是宜有師鉞之雄鼎
席之拜乎號朝發懇章暮辭伯父其承之以光顯我親

親之愛所辭宜不允

賜新除守司徒兼侍中充淮南節度使判相州
韓琦辭免恩命第二表不允斷來章批答

省表具知卿既還兩鎮節朕已歉然不滿於懷而又以
司徒辭遂將潔身而去耶古之三公無其人則闕今有
人矣奚為而闕乎卿趣受印歸榮故鄉無俾天下議朕
謂於定策元老有所薄焉所辭宜不允仍斷來章


賜皇伯祖允弼上表辭免起復恩命不允批答

省表具知古者遭金革之變於是以墨縗即戎今朝廷
無挿羽之警而起王於廬次者誠以王春秋高氣血益
衰扶杖泣血恐有以傷其生故以大將軍印俾還其舊
服以義奪情殆謂此乎無為執辭重貽冲人之憂所辭
宜不允

賜新除守司空依前樞密使文彥博辭免恩命
不允批答

省表具知朕前已發詔加賜卿大司空庶尹在位俯聽

於大庭下孰不動色謂之當然曷為固稱匪德執謙弗
回繡裳袞衣委而未拜夫有功不圖為善者廢大號復
還譬之反汗致朕於此其何以示天下所辭宜不允



欽定四庫全書

集部

鄭溪集卷

十二

詳校官庶吉士_臣馬履泰

檢討_臣何思鈞覆勘

謄錄貢生_臣劉錫珪

謄錄貢生_臣趙珍

謄錄監生_臣龍舜耕

欽定四庫全書

鄭溪集卷十

宋 鄭獬 撰

口宣

白溝驛撫問大遼賀同天節人使及賜御筵口

宣

有勅卿等恭修禮聘來慶誕辰適臨封館之初載錫賓
筵之盛兼申慰諭并示眷慈

都亭驛賜大遼人使賀正畢御筵口宣

有勅卿等寶鄰修聘文陛會元顧還玉以成儀俾加遵
而錫燕體茲至意諒洽多歡

瀛州賜大遼人使却回御筵口宣

有勅卿等鄰歡畢講使傳旋歸已次上開將逾畫壤宜
頒嘉燕庸慰遐征

賜大遼賀同天節人賜入驛御筵口宣

有勅卿等肅將鄰聘來慶誕辰已祇見於王庭宜宣慈
於賓席庶臻樂衍庸示睠懷

賜大遼賀同天節人使回北京御筵口宣

有勅卿等旋軫鄰邦解鞍留府屬炎風之侵鬱涉長道
以良勤宜錫燕私用申寵眷

賜大遼賀正旦人使入見訖歸驛御筵口宣

有勅卿等肇履歲元來修鄰聘已奉造庭之對適居授
館之安宜賜燕私用符暎矚

賜人使朝辭歸驛御筵口宣

有勅卿等展幣成儀旋車復命方違顏於震極爰申貺

於賓筵宜用拜嘉副茲將意

賜人使回至瀛州御筵口宣

有勅卿等肅馳歸馭甫望鄰封方少憩於征車宜寵頒於燕席眷言行邁庸示均慈

北京賜大遼賀同天節人使御筵口宣

有勅卿等誕辰啟節鄰聘備儀眷言使傳之華適戒別京之次特申燕賚庸示榮恩

班荆館賜大遼賀正旦人使到闕御筵口宣

有勅卿等恭修鄰聘來奉歲朝飭使傳以載馳俯都城而暫舍特申燕賜庸示寵嘉

北京賜大遼賀正旦使副御筵口宣

有勅卿等巧厯推元寶鄰修聘方擁壇於北道聊稅鞅於別都特示燕私用勤行邁

雄州賜大遼賀正旦人使御筵兼撫問口宣

有勅卿等肅講鄰歡荐朝歲首適乘輶之及境宜折俎以均慈兼諭詔言併申嘉矚

閣門賜宗樸告勅口宣

有勅卿宗藩所倚聖考維嘉屬天祚之不承首皇支而
惇叙已孚大號宜服褒章

閣門賜起復皇伯祖允弼告勅口宣

有勅卿王庭夾輔天族儀刑茂資屏翰之忠式變苴麻
之制往膺褒冊祇服內朝

賜大遼賀正旦人陳春幡勝春盤等口宣

有勅卿等將命鄰邦修歡正歲適春元之肇建嘉節物

以彌新彩藹彫盤併申寵錫

雄州賜大遼賀正旦人使却回御筵魚傳宣撫

問口宣

有勅卿等建旃來聘促轡言歸顧仁境之相望即使車
之亟邁載申燕貺用表恩私

賜宗樸第二表不允斷來章批答口宣

有勅卿進褒近戚孚告大庭雖需奏之屢辭豈俞音之
可輟無稽成命以鬱僉言

賜皇伯祖東平郡王允弼生日禮物口宣

有勅朕熙隆邦教惇叙藩宗矧維耆哲之尊夙茂扶持之望屬茲誕日載渙醇恩俾爾壽域以符善祝

二月一日賜宰臣曾公亮生日禮物口宣

有勅夾鍾變律甫及初交大昴淪精誕生碩哲載將蕃錫俾衍多祥期輔王家永熙天厯

賜檢校太尉兼侍中曹佺生日禮物口宣

有勅卿貴極珥貂雄兼授鉞屬林鍾之炎序啟蓬矢之

嘉祥特厚賚恩以綏壽祉

賜皇伯彰德軍節度使同中書門下平章事宗
樸生日禮物口宣

有勅歲屬窮陰日臨下浹維靈源之發秀誕英戚以稱
賢特示珍頒用申壽祝

恩州賜大遼皇太后賀正旦人使茶藥口宣

有勅卿等修睦鄰歡展儀歲聘方祈寒之增冽涉長道
以良勤將輔至私宜申稱祝

賜黔州觀察使涇原路副都總管盧政赴闕茶

藥口宣

有勅卿等荐膺名節還衛周盧遠冒寒威已趨圻甸特
申彌賚庸示眷懷

賜盧政赴闕生科口宣

有勅卿夙駕戎軒祗趨名節載凌風露已及闕廷爰有
分頒備茲牽餼勤歸之寵宜用欽承

賜永興軍韓琦茶藥口宣

有勅卿辭榮宰席總帥咸京究民政以初頒履天和而
滋茂爰加珍錫兼諭至言

賜觀使留後賈逵赴闕茶藥口宣

有勅卿召從帥聞入衛王宮夙驅戎乘之嚴載冒征岐
之阻特頒品劑庸示眷隆

恩州賜大遼皇太后賀同天節使副茶藥口宣
有勅卿等遠馳使傳來講鄰歡顧衝涉以在途宜便蕃
而申貺珍芽靈劑併示眷懷

恩州賜大遼皇帝賀同天節使副茶藥口宣

有勅卿等恭持鄰聘來慶誕辰屬春律之載暄涉征塗之彌永特申珍貺庸示殊私

撫問河北西路沿邊臣寮口宣

有勅卿等比膺朝選分幹邊陲屬年籥之戒寒飭使軺而申問再加勤瘁庸示眷懷

撫問西京永興軍并陝西轉運司臣寮口宣

有勅卿等遵職於外服勞在公適歲紀之戒寒飭使華

而申勞永言盡瘁彌屬予懷

撫問宣徽南院使郭達口宣

有勅卿顯膺溫詔出總中權屬朔瑄之凝寒擁戎旗而就道特馳使指爰示恩私勉爾邁征體予至意

撫問判北京臣寮口宣

有勅卿維時雋德久殿留都晏歲乘寒衆祥來輔諭言斯及嘉矚彌深

撫問陝西安撫使韓琦已下口宣

有勅卿等夙被朝僉出膺邊寄維窮冬之紀序視吉履以協祥簡在服懷特申詔諭

撫問南京張方平口宣

有勅卿解紱宰庭寢苦里閑載維巨創特遣諭言副此注懷無為過毀

撫問涇原鎮戎軍路臣寮口宣

有勅卿等夙膺朝委分蒞邊衝服官次以良勤集春祺而增厚因茲命使諭以詔言

撫問判永興軍韓琦口宣

有勅卿輟從公鼎出拊侯藩乘春籥之布元味道腴而
均粹載申勞問彌渴儀刑

撫問邠寧環慶等路臣寮口宣

有勅卿等並膺朝寄分蒞邊衝屬當歲律之和益茂春
祺之嚮載嘉盡瘁特示諭言

雄州撫問大遼國賀同天節人使口宣

有勅卿等並講鄰歡恭趨誕節馳使輶而載遠授境舍

以惟寧特示諭言用申嘉矚

撫問判河陽富弼口宣

有勅卿鈞衡舊德屏翰元臣載垂春律之和彌集天祺
之茂時申諭問庸示倚毗

雄州撫問大遼國賀正旦人使口宣

有勅卿等甫屆歲元來修鄰聘顧遵途之方永屬涉境
之云初特示拊存用昭嘉矚

撫問判大名府韓琦口宣

有勅卿宰府元臣留都重寄茂履陽春之季諒綏吉祿
之蕃特示拊存用昭眷倚

賜判汝州富弼赴闕詔口宣

有勅卿國之耆雋朕所倚毗宜解紱於近藩亟騰裝於
便道特馳名節日佇朝儀

閤門賜岐王顥加恩告勅口宣

有勅陪獻郊宮協成嚴祀均釐屏翰首被褒恩孚號維
行宜拜而受

賜景靈宮使曹佺加恩告勅口宣

有勅禮成大報恩洽外親密露至誠懇辭嘉命顧渙恩之已及豈私請之能從

賜新除宰臣富弼辭恩命不允批答口宣

有勅朕稽於僉論斷自深衷必圖任於老成可倚成於大政毋煩懇避往拜恩章

賜富弼斷來章批答口宣

有勅卿奮績三朝更柄二府顧孰踰於舊老宜入冠於

中階無徇謙辭以稽羣望

賜使相宗樸辭恩命第一表不允批答口宣

有勅肆朕繼文若時均澤維戚藩之尊屬祇宰席之褒
章無執撓謙即宜祇踐

賜大遼賀正旦人使銀鈔鑼唾孟子錦被褥等
口宣

有勅卿等建旃來聘適慶於元正授館甫寧宜推於珍
賜用昭嘉矚至可欽承

賜大遼賀同天節人使生餽口宣

有勅卿等乘輅荐至授館甫安眷言跋履之勞爰備餽
牽之錫即宜欽受以副眷懷

賜文武臣寮并大遼賀同天節人使錫慶院御
宴口宣

有勅卿等奉觴稱壽載逢誕月之祥酌醴御賓宜錫需
雲之宴均茲行樂示我寵懷

賜大遼賀同天節人使鈔鑼唾孟子被褥等口

宣

有勅卿等協講鄰歡恭循使範適解鞍而暫息顧授館
以初寧爰示賚頒庶資服用

召翰林學士王安石入院口宣

有勅卿賢具素優德名絕出行潔而才茂學深而志通
嘗奮高文入司雅誥適佩符於藩府宜促駕於鋒車更
宜禁林發潤天藻攄忠嘉之閱論補密勿之沈謀副我
虛懷服茲優數今差某官召卿入院充學士

賜宰臣以下錫慶院罷散同天節道場酒果口

宣

有勅卿等共傾精懇肅設淨筵慶甲觀之誕祥獻華封之壽祝醇醪甘實宜示燕私

賜宰臣以下大相國寺散同天節道場香合口
宣

有勅卿等以朱明啟序誕慶標辰虔依妙覺之慈共祝延洪之筭載嘉忠恪宜示分頒

班荆館賜大遼賀正旦人使到闕酒果口宣

有勅卿等講修歡聘涉冒寒威適稅駕於都城宜肆筵
於候館醇醪珍實併示寵頒

賜大遼賀正旦人使內中酒果口宣

有勅卿等夙馳使傳繼講鄰歡方朔吹之屆寒宜醇醪
之寵錫副之珍實併示隆恩

同天節錫慶院宴賜文武臣寮并人使酒果口

宣

有勅玉虹紀節湛露均歡有溢爵之芳醪有加籩之甘實并為珍賜用示渥恩

賜大遼賀同天節人使內中酒果口宣

有勅卿等旅朝丹陛恭薦壽觴顧嘉事之甫成講兩儀而用享珍芑良醞併示寵頒

就驛賜大遼人使朝辭後酒果口宣

有勅卿等建旃來聘展幣甫成旋軫于歸遵途茲始載錫珍醇之品用申優渥之恩

賜大遼賀正旦人使却回班荆館酒果口宣

有勅卿等修歡甫畢復命載歸飭使傳以遵途俯都門而留燕清壺甘實爰示寵頒

就驛賜人使射弓例物口宣

有勅鄰聘荐修使華增美方屬憂國之制猶存賓射之儀特賜恩頒用申寵待

賜富弼轉官對衣鞍轡馬口宣

有勅卿懇辭袞鉞復奠藩垣適開揆路之榮宜享康侯

之錫內閣良驥上褚兼衣特遣使華往申君賜

賜宗樸生日禮物口宣

有勅卿內朝之雋近戚維尊屬朔瑄之窮陰誕靈源而
毓秀特優珍賁以祝壽祺

表

英宗皇帝大祥永厚陵奏告表

四氣回薄忽如過隙創鉅未已奄及首除馳心神闕摧
咽奚勝

河北地震奏告表

五行大經沴而為震咎在匪德茲民何辜彌歲驚虞靡
獲寧處惟神聰直庇祐一方載遣使輶恭造靈館冀蒙
涓伏憫此淪胥延首馳心遲聞善應

陰迫陽伏地乃震搖跨河以北迄今不寧咎匪自他發
於渺德俾茲黎庶日虞陷騫敢祓齋誠仰干神造冀蒙
孚佑以獲靜安隱惻於懷曷勝懇禱

宣祖永安陵太祖永昌陵等處帝后為改年奏

告表

虔遵遺訓紹履真圖稽叅五始之文叙建一元之法誕
茲鴻號表以初年載擇穀辰敢忘祇告

英宗皇帝小祥奏告永厚陵表

欽承遺業藐然在疚起居出入思見慈顏日月駛馳俄
及祥練泣望神寢哀哽奚勝

同前內中奏告表

白雲在望何處攀龍落景不留忽如犇駟改練冠而遵

變僊玉座以含哀恭惟尊謚皇帝駿命溥將休光淳烈
世傳禹跡之異人畏軒丘之威屬祥祭之來承推孤心
而永慕

同天節內中奏告真宗仁宗英宗皇帝表

赤煒首序炎律應期辰推上浹之初天祚誕彌之吉欽
惟三后對越上靈綿瓜瓞之蕃支錫岡陵之茂祉祇承
寶系虔奉珍圖載臨震夙之辰適紀長羸之序惟在天
之靈德流奕世之休光饗此治安實由燕翼

永昭陵二月旦表

氣冒於卯日躔在奎驚濡露以變辰感堅冰而入薦恭
惟尊謚皇帝休功奕世大業格天皇威不泯於軒臺盛
德空傳於舜樂阻趨晨闕增極孝思

南郊禮畢奏謝諸陵帝后表

躬執籩豆祇見上帝嘉薦翼翼熙事告成神靈顧饗隤
祉如茨實賴先烈畢茲禋祀

東嶽帝生日奏告會聖宮三清玉皇聖祖九曜

嶽帝佑聖真君表

岱嶽炳靈魯邦作鎮司春元而毓物竦震位以極天適
膺載誕之期敢致潔誠之告即臨珍館肅展齋儀仰祈
隆鑒之靈來集龐洪之祉永延宗祏庇此羣生

年節上永安陵等處諸皇帝表

維帝出震以王次春屬雲陞以朝元瞻神軒而阻謁恭
惟尊謚皇帝功包太極治洽鬼方越靈德以在天震休
光而奕世遐懷丕烈彌劇時思

同前諸后表

三陽作歲萬寶萌春茂臨初吉之辰阻奉上丁之謁恭
惟尊謚皇后堯門益聖軒曜儲祥咏美化以攸存望徽
音而已遠履端伊始結慕彌深

年節上南京鴻慶宮等處諸帝表

攝提建歲太簇統元允屬履端聿懷追孝恭惟尊謚皇
帝堯仁未遠禹跡空存地經清蹕之遊世奉靈宮之薦
靡遑躬謁倍積遐思

冬節上永安陵等處諸后表

象見珠躔氣萌玉琯覽初爻之來復仰慈範以如存恭
惟謚號皇后德懋嬪虞功隆翼夏邇真遊之永閔潔時
薦以空陳進牘馳誠彌增怵惕

同前諸帝表

斗移子位日御巽維對越上靈永懷聖烈恭惟謚號皇
帝澤漸萬世威存百年厭黃屋之深居從白雲而遠駕
徒瞻神闕增積孝思

冬節上南京鴻慶宮等處諸帝表

畧長南表氣動黃官方協序於天元益追懷於祖武恭
惟謚號皇帝享隆駿命燕翼大猷冀真馭以少留敝靈
宮而如在與時茂對結慕增深

皇帝南郊禮畢謝皇太后表

臣某言恭嗣寶圖首嚴大事即高丘而展采違慈幄以
增懷奠玉已燔回鑒在駕顧協成於祀典實仰賴於母
儀內竭深衷曷勝忭賀

楚國保寧安德夫人景氏等賀南郊禮畢表

執籩豆以薦嘉肇成筵祀罄舟車而兼覆均決歡心屬
我休辰載敷綍典恭惟皇帝陛下事親以孝移忠之教
行治民以仁好恕之風洽惟上穹之對越適大報以告
成靈禧簡簡以下孚精意顯顯而上格龐恩靈霽羣動
歡呼臣妾等仰光嚴宸久叅內掖竊觀熙事彌忭丹衷
左右直御侍邢氏等賀南郊禮畢表

郊丘昭報適觀聖饗之能海寓均歡並荷神禧之被矧

茲內掖彌決柔悰恭惟皇帝陛下如日繼明體天行健
法宮親事已諧萬國之雍和吉土就陽載洽三靈之眷
祐至誠孚格縉禮備成臣妾等忝列禁庭親逢聖旦欣
愉允切鼓舞奚勝

請皇帝聽政第一表

上穹降禍大行皇帝奄棄萬國天覆地載罔不攀號中
謝恭惟皇帝陛下長發其祥敷聞在下遂奉綴衣之遺
訓以傳神器之至公羣元有歸大業斯定惟是庶政未

親省覽凡百在公無所稟承中外羣心不勝傾望冀上
顧宗廟之重少節哀疚之情從順變之禮文行先朝之
故事勉臨聽斷以慰邇遐

請皇帝聽政第二表

嘗露封章懇祈臨政未蒙俞可彌負兢惶中謝恭惟大
行皇帝昭示至公深惟大本惟神器之至重得聖子以
能傳四海於是有歸萬化所以無曠天下顯顯而想望
號令羣臣懇懇而思見威儀而陛下泣血特深銜哀過

毀狗禮文之常制廢庶務之大經凡在事機未垂聽鑒
伏望上遵遺訓俯順羣情屈孺慕之至懷為生靈之盛
福時臨便殿躬攬大權庶使朝廷皆有矜式

請皇帝聽政第三表

臣等屢貢血誠冀回天聽羣心傾望未賜允俞竊以為
民立君庶政不可久曠以日易月後王所以制宜雖哀
慕之無窮豈聽覽之遂廢滯務積而不發大號鬱而未
宣羣臣惶惑無以稟命而况大行在殯山陵未修凡百

事機動闕奏請必資宸斷方敢奉行伏望皇帝陛下遠稽故事近奉遺音以列聖之基業為懷以先皇之付託為重俯從大計少屈孝思躬攬權綱以御天下臣等叨榮在列義所不安銜泣叙言期於得請

賀明堂禮畢表

三星居火角之次載考於乾圖五帝列太微之庭並隆於國祀罄精衷而贊見極厚禮以告成清風翔而羣靈回叶氣流而嘉福應中賀恭惟皇帝陛下纘興聖緒躬

履炎符祗票著事天之誠明發懷思親之感詔季秋而錯事即衢室而告虔並斥繁儀咸資故實蓋聖人為能以享帝必盡乎至誠惟嚴父莫大於配天用追乎來孝嘉幣升而既奠純犧奉以告牲禮容雜乎天光恭意見乎玉色茲實希濶之典屬我昌明之朝中外蒙休人神胥悅臣等備觀熙事獲庠攸司傳清蹕以言還望赤墀而增忭

賀皇太后立皇后表

作嬪京室將嗣於徽音恭事慈闈庶成於孝養詔言所
被民頌交騰中賀恭惟皇太后殿下坤道靜專母儀光
大早茂降嫺之德遂成翼夏之功佐佑皇猷發揮鉅典
念瑤齊之曠祀舉寶冊之隆文治必自家蓋有太任之
成法化行於國將復周南之正風臣等備列明庭欽聞
嘉命忻愉之極忭蹈攸深

賀皇帝立皇后表

之玉發詔蘭殿圖儀彤治國之高風尊覩天之懿德凡

居履蹈罔不歡愉中賀恭惟皇帝陛下寶厯在躬至仁撫世武繼文而受命舜協帝以重華思格治平寶資內輔乃詳求於鉅典俾刊著於徽章玉璽燦乎瑞文金車賁乎法從翬衣進受永承宗廟之祠麟趾來游行應闕睢之化臣等恪居朝次側聽皇猷觀慶禮之將行溢羣心而交忭

賀尊皇太后表

誕告天庭聿遵於先訓奉榮長樂增大於鴻名舟車所

通罔不相屬中賀恭惟皇帝陛下仁如天覆聖與日躋
適當纂業之初彌切顯親之志首圖懿號躬上慈闈即
深詔於有司俾參求於故實差擇元辰之吉鋪宣寶冊
之文行展盛儀用昭前烈聖人至德孰加孝治之風天
下羣心得奉母儀之訓臣等猥緣盛際獲綴通班方側
聽於制音竚竚觀於典禮欣榮踊躍倍萬常鈞

欽定四庫全書

鼎新書
卷十

欽定四庫全書

鄒溪集卷十一

宗 鄭獬 撰

表

賀冬表

律次黃鍾日躔南極尊一王之履至舉萬國以來同亞
於歲朝著在甲令中賀恭惟皇帝陛下陶成庶類照臨
四方推神筭以授時奉天元而御統觀陽氣之升則以
進賢者之類鑒陰爻之剥則以斥小人之羣庶求大端

用資明德臣等叨榮表位趨慶大庭適及嘉辰共期善
祝

賀正表

臣某言伏以春重三朝尊明辟履端之始禮嚴元會謹
諸侯受計之初品物達新萬邦獻祉臣誠懼誠忤頓首
頓首恭惟皇帝陛下緝熙民極惠迪天元福與衆均慶
光華日月之旦物游澤茂萃清明玉燭之和大業延洪
懽誠同向臣限以守麾遐土引領中宸瞻雲闕之觚稜

遠虎搏之軋挹徒深頌祝莫極傾馳

天慶節謝內中露香表

炎精御歷大帝錫符孚嘉號以紀辰協靈文而瑞世幾
及冲眇敢怠欽承維是羣生悉歸洪造燎好香而升薦
祝美貺以來膺

天祺節謝內中露香表

珍符薦瑞佳節紀辰恭祓精衷密升寶炷叢霄在望靈
鑒可期冀錫茂祥以昌皇祚

同天節內中露香表

膺顧上靈繼明大統屬長嬴之首月紀震夙之嘉辰洽
此億寧寶縣右序庶格緝熙之福丕承桓撥之期

冬節內中露香表

天元統紀神策告符維上帝之佑民執大鈞而播物恭
燃寶炷密薦精衷凡在羣靈悉蒙嘉福

年節內中露香表

玉儀改度寶典推元茂履之朝總綏四極恭燎寶薰之

薦式孚丹款之表圓極炳靈函生隕祉

中書賀壽星見表

乾歷紀元適開於景祚星符見象爰示於嘉祥中外具
瞻遐邇均慶中賀恭惟皇帝陛下躬膺寶籙祗適先猷
大孝通乎神明至誠格乎天地上帝申錫瑞物荐臻燦
若休光發乎景緯出離方而動色俯南極以騰精考以
經躔不失仲春之夕見言其驗證蓋符人主之壽昌臣
等備位宰司獲觀靈貺將延洪於睿筭彌聳躍於丹棕

又樞密院賀壽星見表

玉琯分秋珠躔見象對拱北辰之遠迴臨西位之高馮
相發占靈基紀瑞中賀恭惟皇帝陛下繼明如日至意
通神衍協氣以旁流總美祥而翕受燦然靈貺發於乾
文昏曉互推獨驗一星之次天人合應茲為萬壽之符
臣等誤列近司獲逢熙旦將益無期之筭彌增交抃之
誠

賀皇太后表

體包坤順道配天元絕外舍之私恩服中宮之儉德輔
佐先帝夙聞陰教之修保護聖躬益著母儀之愛

請建壽聖節表

樞星炳耀華渚流祥蓋神靈之告期茲帝王之應運是
為慶節適在聖時爵有舊章敢申虔請中賀恭惟皇帝
陛下授堯歷數邁舜聰明踐祚云初庶務茲始惟發春
之首月實誕聖之嘉辰遠夷奉琛以來庭華封交手而
獻祝將昭嘉會宜紀鴻名臣等不勝大慶請以正月三

日為壽聖節舉體道之微稱演後天之遐筭庶使需雲
報燕螯四海之驩心北斗浮觴上萬年之眉壽

集禧觀鴻福殿祈雪道場表

地媪不宥壯陽泄溫民癘愆和農疇匱澤求愆謝咎徧
走羣祠加精致誠未昭美證載循禋法祇絜齋場震發
靈休庶幾嘉應飛霙灑潤延首以需

集禧觀洪福殿開啟宰鷺祈雨道場表

薰風首序甘澤愆期慮嘉種之將蕪結老農之浩歎載

臨靖館肅啟清場陳舒雁以封牲象神龍而作繪冀零
嘉靈竚應虔誠恐懼側身庶消咎證

知杭州謝到任表

剡章初上願乘一障以衛藩疏寵過優更莫三吳而出
牧擁連檣之華艦戲綵服於親闈不失家居俄臨治境
磅礴湖山之秀繁華郭郭之雄已見吏民甫宣威德中
謝伏念臣踈愚自信樸陋無堪厲鑠羽於鸞鵠之羣託
危根於芝蘭之圃動多得咎誰肯為容苟非科級之使

然安得仕宦之至此惟陛下廓無私之鑒知臣孤立而無朋惟陛下推不報之恩俾臣偷安而久處日虞蹇薄恐負獎提方衆賢引類以並升宜拙者懷慙而遠去重以食口之衆窘於京華之居慙懇冒聞俞音報可改經帷之密侍徙民版之清曹仍領東藩兼督一道矧武林之名部實母氏之故鄉井舍猶存松楸未改旨甘易具豈惟啜菽以承歡親戚至前時得稱觴而上壽此人子之所樂亦當世之至榮不料便安出於意望此盖伏遇皇

帝陛下仁包覆載知燭幽深在蟲魚則未嘗有涸澤之
傷在草木則未嘗有童山之暴况朝紳之舊列參翰苑
以叨榮曲沛天慈俯從人欲付之都府寵以帥權敢不
益勵初心勤求善治詔條具在唯當承命以恭行訟牒
雖繁亦冀清心而少息緩以歲月之久效此涓塵之勞
仰副清衷少酬鴻造

謝翰林學士表

天光下燭帝語親聆恩不他歸命由上出孤生得路榮

欽定四庫全書

御溪集
卷十一

六

遇最多臣其中謝竊以翰苑參華儒林劇選詎獨玩其
詞藻蓋欲觀其器能謀足以破天下之疑文足以鼓天
下之動茲為內相乃無間言伏念臣庸庸無能聲牙少
合結髮而知事主登朝絕不因人在仁祖時初自諸生
擢在羣豪之首於英考世還從右史次居西掖之嚴將
卜兆於先疇遂佩符於南國松阡未列芝檢促還惟慙
補報之未能敢以遲晚之為嘆寒癸有意獨傾向日之
心頑植何知不入大鈞之手蘭無人而自秀鶴在陰而

必聞不圖陛下知其至愚察其寡援面加獎借力賜提
攜墜蓬俄奮於九霄寒燭立增於萬丈遽承詔節入直
禁林驛馬驟來榮生里巷綠衣拜慶喜動親闈華組馭
乎名駒渾金炫乎寶帶愧已深而汗浹感至極以涕零
伏惟皇帝陛下獨持帝王之大權復見祖宗之雄斷號
令四發耳目一新日月不開開則及遠雷霆不發發則
驚人咨棟梁以東求兼椽櫨之采拾敢不益殫忠藎少
效涓埃義有可為必思於圖報死如得所敢憚於捐生

謝知制誥表

西掖代言儒生榮遇猥蒙序擢震懼惟深中謝竊以皇
帝陛下繼丕天之業方發政之初縉紳延頸以希采獲
內自朝廷外及林藪金馬石渠之羣秀飯牛版築之遺
彥奮袂相趨聳冠相屬思欲入侍太微之座日直西省
之闥奮其鴻筆攄其嘉論以快一時之遇而取不次之
賞以駭四海之望而成非常之蹟者顒顒於下曾不得
吐其憤懣而少瞻斧幄之末光乃用常格首及陋愚塞

賢豪之來徑招衆口之沸言黑白倒置士不諫勸殆非
陛下考核名實以新庶政之意然臣在先帝時誤以文
墨擢之上第漸列儒館遂直螭階適會缺員例當次補
而陛下順守累聖人成憲仰遵先帝之餘烈謂後來之
薪既以居上而下體之對不忍棄遺特發明詔俾掌絲
綸生育成就恩踰天地惟當盡節以報洪私

謝賜對衣鞍轡馬表

主恩何厚雖私在笥之衣臣德未昭復辱康侯之馬惟

寵榮之曲被顧驚覩之彌增竊以詞苑宏開洛門密召
寶冠邇寮之選爰須超世之英如臣匪才敢此非望詔
寶衣於內府頒駿產於天閑爛若寵光合茲蕃錫雖袞
冕而下存采菽之舊文在繁纓以朝有丘明之致誚盖
器與名非假人之物而負且乘乃致冠之資永惟濡翼
之羞徒切刻肌之感

謝賜飛白書表

寶軸初傳雲章交燭驟若奎鉤之見象忽如綠字之成

圖賜自明廷榮增節屋中謝恭惟尊號皇帝陛下精探
聖奧欽述先猷敞秘府以宏開詔羣工而肆閱因飛寶
墨縱落輕綃觀聖作以駭驚絢神蹤而妙絕龍騰鳳躍
自成王者之書雲布星陳兼得諸家之體猥煩使指特
貺陋居既捧拜以增光敢秘藏而為永

代漕臣賀收復表

虎士鷹揚屈人於不戰羌戎鳥竄交臂而來臣遐荒震
驚四國交慶蠢爾吐蕃之種世為西夏之雄螳怒當前

鴟張弗茹豢成封豕之惡以逃京觀之誅迨茲舜德之
誕敷始効苗頑而來格連雲瘠野千里桑麻被髮遺黎
一日冠帶此蓋伏遇皇帝陛下淵泉溥博聖武布昭莫
敢不來繼湯孫之遺緒無思不服廣文考之休聲臣四
被明恩謬持使節悵捧觴之無路徒向日以傾葵盡復
故封行謝玉闕之質告成清廟僊聞天馬之歌

奏疏

請聽政納言疏

案此首從名臣
奏議中補入

伏見陛下初即位四方傳聞以謂陛下聰明英斷同符
太祖也有志之士莫不投袂嘆息傾望陛下之風采然
自授政以來號令所發蹈常習故不聞赫然有以鼓動
天下者始以聖躬微疾猶足以為辭玉膳既復尚恭默
而不言者實未知所諭將以陰拱自晦徐觀天下之動
而后出而制之耶則於此殆將周歲萬機之變槩可見
已將以慕商宗之節思得聖人而后用以為政耶傳說
何可數有哉果無之則遂一世而不言耶將以左右牽

制動有畏憚而不敢明為之耶則二府大臣與禁庭侍從皆足以寄腹心又何疑而不與之謀耶是三者皆非所以為術也非帝王南面聽斷之大權也先皇帝時純用仁德以涵育萬物及其人也蓋有偏而不舉者矣夫仁主愛義立斷猶春之為生而秋之為殺也生而不殺則萬物潰爛而不成其如歲功何陛下承先皇之仁愛宜用義斷以整齊天下所謂義斷者主柄也今夫唯唯而不斷可否決於輔臣則主柄屈而不尊如輔臣撲忠

不敢亂大法而為陛下奉行條例止可閱日月而已一
旦有飢饉誰可橫身而為陛下當大事者乎萬一奸人
朋比參廁於其間則天下之大勢去矣陛下眡今日為
治耶亂耶必以為亂則邊兵不試境內無跋扈強臣孰
謂之亂必以為治則威令寢削大綱解而不緝孰謂之
治是治與亂正在陛下留意之秋也左顧則為治右視
則為亂蓋陛下舉首而天下之勢分矣陛下何不日
求賢者與之圖議今所與共大政者不過七八輔臣則

所聞所見盡於此而已烏能窮天下之聰明哉古者謀及卿士清問下民詢於芻蕘於是羣言集而治道成乃欲以七八輔臣之言而望大治豈不為濶略哉臣願陛下特詔天下許盡所言有可採者與之召對至於臣下進見少賜數刻之景訪以得失虛意以求之精察以審之明斷以行之庶幾天下之勢將亂而復治矣如其優游泯默日復一日有志之士解體而去士望去則民從而去陛下尚欲恃四海之衆而保萬世之安乎臣實不

勝愚者之慮

請罷河北夫役疏

案此首從名臣奏議中補入

臣竊聞河北繕城塹儲粟葉以支北寇諸郡奔走怵惕以從事至有帥臣躬督役夫以穿濠池殊可怪笑北敵雖遼遠其舉動亦顧曲直今無釁隙何緣遽有南牧之計比者黥兩地稅戶手背茲雖事生亦未為踰盟之大失臣素知幽燕間鄉民皆黥之非顓以為兵也無屯兵營火伍糧糗器甲之制惟將迎漢使歲役之三月又其

黥之者似聞非北主意乃其酋豪妄為之既已黥之則
可移文訊其所以然彼如自屈則宜約以不可再補苟
能聽我則又何求議者或為敵乘我與西羌有嫌欲用
此為牽制此亦非也其聲勢不足以為牽制耳西羌之
嫌奚與於彼必未能棄六十年聘好而為弱羌絕盟其利
害固可較也今不計其虛實而想像乎沙磧萬里之外
風搖草動則以為翔騎已挾弓而羣至矣於是繕城塹
儲粟藁奚其易動哉河北歲連旱既動力役則不免斂

率於民是未見敵人之一迹而先已自擾其民因虛聲而受實弊是豈為靜勝者耶而必使敵人真入寇我遂不戰而獨城守乎攻城者非敵人之長且將直驅而南則奈何乎廟堂之上哉日者廣州妄奏交趾之人而遽為之易帥調兵以驚動南方之民今又無故而備河北無他將帥不擇兵衆不練財力不充直出於畏怯而已亦何足以明方略之成敗乎臣欲乞陛下密下河北勿令繕修務在安養其民如平時而已則我中國之持重

不為敵人所窺亦可以有成筭矣

論种諤擅入西界疏

案此首從名臣
奏議中補入

臣伏見十月二十四日召兩府大臣入議外言竊皆傳
种諤已提兵入據綏州橫山豪酋挈族內附審如是是
豈朝廷之福耶聚謀累日策將安出事雖隱秘不漏針
芒然趣賈逵竇舜卿就道以毋沆為轉運使發京師兵
及銀數十萬兩備芻餉出錦袍銀帶賜降者觀此則殆
將兩持首尾未有決然判安危之至策也臣前言不可

納橫山及見手詔以諒祚順向深戒邊臣無得生事臣
以為信今迺知朝廷外示綏靜內包陰計茲豈帝王之
大畧哉尊用變詐之士務為掩襲之謀乃戰國強暴之
君所為也況陛下初履天位猶處諒闇宜念祖宗蒙成
太平之業以淵靜鎮海內仁澤結天心不及慮此而過聽一
二邪臣之說欲以奇譎幸邊功此天下盡知其不可而
陛下獨以為可冒而行之聞者莫不寒心然种諤之奪
綏州若不奉陛下之風指安敢一日不俟上報徑驅數

千辛直擣夏境乎不然則擅興有罪陛下何為而不行
誅夫中國以信義撫四夷既約束邊臣無得生事詔墨
未乾而奪其地信義俱棄其曲在我彼將謗辭以請罪
則朝廷何以報之如彼懷不順衽韁裘而犯邊我不得
已而起應之則士卒雖肝腦塗野而不辭蓋舉天下之
怨在彼也今無故而先擾之彼將率其一國之衆而來
爭則士卒有旅拒躊躇而不行者矣蓋舉天下之怨在
我也豈惟士卒之不樂哉府庫之空乏此四海所共患

千金之費不給則必賦諸民則將見隳產壞家棄父母
鬻子孫以供軍期者矣萬一有奸雄之徒窺隙而乘之
嘯為盜賊小則剽屋廬大則跨郡縣於此之時潰爛而
不救則於社稷生靈得無有負乎事有謀小而妨大者
正為此也而神諤不顧國家始末之大計乃欲以一螻
蟻之命以天下為兒戲苟貪微功以邀富貴此正天下
之姦賊若不誅之則無以厲其餘臣以為陛下必欲逆
折禍亂之機牙使不為異日之悔則莫若下詔聲諤之

罪誅於塞下及薛向高遵裕楊定張穆之等皆付有司
次第以治其罪然後遣一介之使持手詔還諒祚以綏
州及橫山之降民遂明告以謬等生事已次第伏罪則
彼又將何求於我如此則顯示中國履信之美而復收
遠人向化之心無遺鏃折戟之費而事立解矣如有言
者希望猶以為不然此皆非忠臣豈敢以犬馬之餘生
而保天下之事乎臣以太白經天四方地震皆為兵象
竊恐兵禍起於橫山之議今見其端矣無使臣言之驗

則朝廷之福也伏望陛下上觀天戒下察人事以宗廟社稷為念以四海生靈為意無令天下無罪之民為姦臣所誤今誅一姦臣而天下定其利害較然可見陛下決意行之無疑臣不勝區區之懇

論水災地震疏

臣竊見去歲自京師西南至於海隅地皆震今歲自京師而北至於朔方又大震迄今不已城郭陷入地民廬悉摧仆長河決溢灌深冀間茲豈細故哉震者陰盛而

迫於陽其發必有所肇而不為虛應考之古而驗於今
似可究其涯略漢和帝永元二年郡國十三震說者謂
竇太后由房闈而制天下今二宮非竇氏之比則不為
宮闈發也安帝建光元年郡國三十五震或地拆裂壞
城郭說者謂中常侍江京樊豐擅天子權今內省非江
京樊豐之比則不為寺人發也晉元帝太興元年一震
說者謂王敦擁兵陵上哀帝興寧二年震說者謂桓溫
跋扈顯朝今大臣非王敦桓溫之比則不為執政者發

也是數者無所當則殆将有兵禍乎光武時郡國四十
二地震而武谿蠻反晉成帝時豫州震而蘇峻亂近者
仁宗時忻代間大震而元昊不庭用此以較之則非兵
而何臣之所憂不在河北而在陝西何者河北雖被災
而南方大稔流離之民相攜而南亦可就穀此惟煩朝
廷戒敕所在務為存恤不令餒死於草莽則無慮矣至
於陝西則自城綏以來至今兩議不決首尾一年凡自
京師所餉縑金已費四百萬至於發卒乘器甲轉芻糧

雜出於民者尚不在此數即不知國家以四百萬緡金而與羌人爭何事耶雖得一綏州而所費如此其利害亦可槩見矣事不早決何止於此則將見國力殫於內民財屈於外怨黷並起姦人搖之其將奈何此不可不深慮也如聞羌人率其螻蟻之衆窺我境土料其裹糧畜牧必未能久駐殆將遁矣然而數出兵而無所攻取者此所以困我彼來則我不可不應兵師既發糧芻既集彼復解而去異時則又來使我奔走為備之不暇此

正墮其術內也則朝廷亦宜破其姦謀以靜自守不為之動彼無所得而退我無所失而守若是者彼來雖數而我備有餘也夫世之治久而之亂不過百年世之亂久而之治亦不過百年此大勢也本朝自藝祖平定四方已來將百年矣治亂之際正在陛下臣以為治今之難難於祖宗之時何則自安史之亂至於五代之末四方之強諸侯已沒其立者皆孱子弱孫勢與數俱窮故太祖太宗一起而掃刈之若去菅草然易於為力也至

於真宗仁宗之初民已離兵革喜見太平故收功報成
垂拱而天下治亦甚易也今陛下非開基之日過已盛
之時萬事寢以衰弊此所以難於為力而甚於祖宗之
時也則豈得不深思遠慮講求所以致治之術乃欲以
玩夷狄取武功苟有蹉跌則遂成衰亂之勢可不慎哉
如羌人引衆而遁則陛下斷之正論早與通好涵養生
靈俾之安處則天災自息雖有震搖亦不能以勝我矣

論臣寮極言得失疏

臣伏見詔書以京師大水為沴壓溺者衆許中外臣寮
極言得失者茲實陛下側身求過思有以消復之天衷
懇懇至於魚蟲草木莫不感動況於能言者哉臣竊伏
思今陛下發詔以求忠言將欲用之耶將欲因災異舉
故事而藻飾之耶苟藻飾之則固無可議者必欲用之
則臣願陳其方臣觀前世之君因變異而求諫者甚衆
書之史冊張以為美事及考其實則能用其言而載於
行事者蓋亦鮮矣徒使後世襲蹈以為帝王之值災異

者於此空言而足矣曷足謂之罪已修德耶今詔音一
發天下忠義之士必有極其所蘊以薦諸朝者此當有
益於治道不為妄作然而疊章累疏繁委而並集則陛
下果能環復而究覽之耶計陛下一日萬幾必未能爾
而將欲入平時章疏事關深密者則留中不出事繁政
體者則下中書事屬兵要者則下樞密院兩府覆奏則
又下羣有司及郡邑至於無所行而後止如此則是有
求諫之名而無求諫之實與前世之為空言者等耳臣

竊謂陛下萬幾之繁既未能徧覽則宜選置官屬令專掌之今之羣臣所上章疏日許兩府及近臣番休更直便殿賜坐與之從容條陳講貫其可者則熟究而行之不可則罷之有疑焉則廣詢而後決之羣言得而衆事舉此應天之實也夫下之為言甚難而上之聽者常忽焉自非忠憤激於心則孰敢隳肝膽而冒忌諱者古之能建立功業者未嘗不好諫也好之者繇其能褒進而招徠之也太祖太宗時言事者多被甄賞自近年以來

欽定四庫全書

御溪集
卷十一

二十一

茲事寥濶仁宗寬仁最能容直言而不能甄賞也願陛下采羣臣之章疏如其宏謀偉論可施於當時者則召見之與之共議不惟質其言且以觀其材大者擢之以職任次者加賜金帛無取焉報罷之如此則陛下下詔有實言得言有實用且使史冊書之以為某年大水詔求直言用某人言行某事以絀夫前世之為空言者則無令陛下詔書藏於有司復為數幅空紙而已惟乞陛下斷而行之則臣不勝大願

論人材疏

案此首從名臣
奏議中補入

臣比因賜對論及房喬杜如晦陛下問臣今世有此人
否臣對以房杜者曠世無之苟所見未至則安知今世
無有如房杜者哉臣退思陛下思得房杜用之此唐太
宗之用心也而在陛下求之至與未至耳自古帝王何
嘗求異世之士而用之當大業之際富貴乎廟堂之上
者天下止知有宇文述虞世基而已又孰知有房杜也
則房杜者乃隋室之棄士也及太宗龍躍乎太原於是

二人者攀鱗而起左攜右挈遂定天下當是時天下灑然始知有房杜焉則今之處幽約甘藜糝者焉知其人不
及房杜者耶顧陛下網之未密搜之未至耳夫天下之士有材在己者思有為於世猶寒者之欲衣飢者之欲食其求用之心尤切於世主求賢之意而其迹無繇而至前或湮廢而不遂者可勝言哉惟有道之士以義自勝則雖老死於巖穴間無憾也至於雄傑之士則不然如其差跌則潛心世變幸有風埃之警遂躡而擾之

故劉備久不跨馬而髀肉生見而流涕此其志豈斯須
忘功業哉而欲漢室之不搖豈可得乎故世主必渠渠
懇懇欲得賢而為我用者正為此也虛懷屈己以訪之
高爵厚禮以來之上之所好其下必有應者好之而未
至不可遽曰今世無房杜高宗思賢其精誠乃通乎夢
寐於是得傳說焉此用心之顓也臣願陛下推此心繼
之以不倦則必有如房杜者杖策而至矣言陋意拙惟
陛下裁赦

欽定四庫全書

御漢集
卷十一

三十二

論薦士求直言疏

案此首從名臣
奏議中補入

臣聞舉天下之事者不患乎知不及而常患乎力不足
則舉而不勝其勢必屈故知之而不能窮天下之理必
任羣力而舉之茲所以汲汲而求賢也自陛下即位以
來未聞卓然褒進一賢者天下之事猶如前日而欲起
太平之治者難矣然陛下深拱九重固未能周知羣臣
之能否夫天子所以寄耳目者公卿大夫也公卿大夫
日與庶官接宜熟知其所為其下固有豪偉非常之士

而未奮者臣願陛下降明詔俾按察官及兩制正刺史
已上各許特薦文武官之有才能者舉如不實令御史
劾奏請論以法如此則宜得實才陛下按其籍眡其所
舉者衆則茲人必有過人者美官有缺因而次補之績
效既明則又顯擢之不下席天下之賢能積於此矣臣
又聞天下之事無窮雖堯舜之明而欲盡無窮之事臣
知其必殆然卒所以能為堯舜者以其能兼聽無窮之
言也事機出於彼羣言會於此雖至深至隱皆可羅列

而陳於前矣傳曰舜好問其弗信已乎臣亦願陛下降
明詔許中外臣僚草萊之士皆得上封事極言無諱陛
下總羣策而處之則明徹乎萬里之外矣豈惟得言哉
又將以得士矣言如詣理或可賜對柔顏懌色以索其
所蘊則天下之才何逃乎二者皆陛下基命之初急務
也如可施用則乞付翰林草詔中書具為條約詔下之
日必有畜才而待用者翹然而出矣敢冀陛下留意